

**БҮГД НАЙРАМДАХ МОНГОЛ АРД УЛСЫН ЗАСГИЙН ГАЗРЫН ТОГТООЛ ЖУРАМ БАТЛАХ
ТУХАЙ /Ажилласан хугацааг тооцох/**

1991 оны 01 дүгээр сарын 11-ний
өдөр

Улаанбаатар хот

Дугаар 13

БНМАУ-ын Засгийн газраас ТОГТООХ нь:

Ажилласан хугацааг тооцох журмыг хавсралтын ёсоор баталсугай.

**Энэ тогтоол гарсантай холбогдуулан Сайд нарын Зөвлөлийн дор дурдсан тогтоол,
тогтоолын заалтыг хүчингүй болсонд тооцсугай:**

- а) «Ажилчин, албан хаагчдын хөдөлмөрийн дэвтэр хөтлөлттэй холбогдсон зарим арга хэмжээний тухай» 1965 оны 7 дугаар сарын 28-ны өдрийн 285 дугаар тогтоол;**
- б) «Заавар батлах тухай» 1972 оны 2 дугаар сарын 17-ны өдрийн 49 дүгээр тогтоол;**
- в) «Улсад ажилласан хугацааг тооцох журмыг батлах тухай» 1974 оны 10 дугаар сарын 19-ний өдрийн 406 дугаар тогтоол;**

г) Сайд нарын Зөвлөлийн 1979 оны 412 дугаар тогтоолоор батлагдсан «БНМАУ-ын тэтгэврийн хуулийг биелүүлэх заавар»-ын 71—76 дугаар зүйл.

Энэ тогтоолыг 1991 оны 1 дүгээр сарын 1-ний өдрөөс эхлэн дагаж мөрдсүгэй.

БНМАУ-ын Засгийн газрын Ерөнхий сайд Д. БЯМБАСҮРЭН

БНМАУ-ын Засгийн газрын Хэрэг эрхлэх гаарын дарга Д. МОЛОМЖАМЦ

Засгийн газрын 1991 оны 13 дугаар тогтоолын хавсралт

АЖИЛЛАСАН ХУГАЦААГ ТООЦОХ ЖУРАМ

НЭГ. Нийтлэг үндэслэл

1. Иргэдэд ээлжийн амралт олгох болон тэдний ажилласан хугацаатай холбогдох бусад эрхийг баталгаажуулахад ажилласан хугацааг тооцох энэ журмыг баримтална.

2. Улсын нийгмийн даатгалын шимтгэл төлж хөдөлмөр эрхэлсэн болон энэ журамд заасан бусад хугацааг ажилласан хугацаанд тооцно.

3. БНМАУ-ын иргэд гадаад ажилласан болон гадаадын харьяат иргэдийн БНМАУ-д ажилласан хугацааг хоёр улсын гэрээ хэлэлцээрт заасны дагуу тооцно.

4. БНМАУ-д байнга оршин суудаг бөгөөд аль ч улсын харьяат биш иргэдийн тус улсад хөдөлмөр эрхэлсэн хугацааг ажилласан хугацаанд тооцно.

5. БНМАУ-ын хууль тогтоомжид заасан журмын дагуу хөтлөгдсөн хөдөлмөрийн дэвтэр нь ажилласан хугацааг тооцож тогтоох үндсэн баримт болно.

Хувиараа болон иргэд хоорондын хөдөлмөрийн гэрээгээр хөдөлмөр эрхлэгчдийн ажилласан хугацааг тооцохдоо улсын нийгмийн даатгалын шимтгэл төлсөн баримтыг үндэслэнэ.

6. Ажилласан хугацааг нь тооцох баримтгүй болсон иргэдийн ажилласан хугацааг шүүх тогтооно.

7. Хөдөлмөрийн дэвтэр нь зохих журмын дагуу хөтлөгдөөгүй иргэдийн ажилласан хугацааг тэтгэвэр тогтоох орон тооны бус байнгын комисс тогтоож болно.

ХОЁР. Ажилласан хугацаанд тооцох хугацаа

8. Ажилласан хугацаанд дор дурдсан хугацааг оруулан тооцно:

а) улс, олон нийт, хоршоолол, хувийн үйлдвэрийн газар, байгууллагад хөдөлмөр эрхэлсэн хугацаа;

б) хувиараа болон иргэд хоорондын хөдөлмөрийн гэрээгээр хөдөлмөр эрхэлсэн хугацаа;

в) зэвсэгт хүчин улсын аюулгүй байдлыг хангах, цагдаа болон хорих ял эдлүүлэх байгууллагад алба хаасан хугацаа;

г) гадаад орнуудтай хувь нийлүүлсэн байгууллагад хөдөлмөрийн гэрээгээр ажилласан хугацаа;

д) гадаад орнуудад байгаа БНМАУ-ын улс, олон нийтийн байгууллагад хөдөлмөрийн гэрээгээр ажилласан хугацаа;

е) олон улсын байгууллагад хөдөлмөрийн гэрээгээр ажилласан хугацаа;

ж) БНМАУ дахь гадаад орны байгууллагад хөдөлмөрийн гэрээгээр ажилласан хугацаа;

з) тусгай мэргэжлийн болон их, дээд сургуулийн оюутны үйлдвэрлэлийн дадлагын хугацаанд үйлдвэрийн газар, байгууллагад ажиллагчийн орон тоонд ажилласан, үйлдвэрлэлийн дадлагын программын дагуу шинжилгээний экспедицийн орон тооны бүрэлдэхүүнд орж ажилласан хугацаа;

- и) төрүүлсэн болон үрчлэн авсан хүүхдээ 2, ихэр бол 3 настай болтол нь асрахаар авсан 2 удаагийн чөлөөний хугацаа;
- к) бүтэн өнчин 3-аас доошгүй хүүхдийг зохих журмын дагуу нэг дор үрчлэн авсан буюу асран хамгаалагчаар тогтоогдож 5 нас хүртэл нь асарч бойжуулсан хугацаа;
- л) БНМАУ-ын зэвсэгт хүчний эгнээнд цэргийн жинхэнэ алба хаасан хугацаа;
- м) ажлаас буруу халагдсаны улмаас түрүүчийн ажилдаа эргүүлэн тогтоогдсон ажиллагчдын ажилгүй байсан хугацаа;
- н) хэргийг нь хэрэгсэхгүй болгосон, цагаатгагдсан хүмүүсийн хилс хэрэгт мөрдөгдсөн ба хилс хэрэгт ял эдэлсэн бүх хугацаа;
- о) аспирантур, докторантурт суралцсан хугацаа;
- п) техник-мэргэжлийн сургуульд суралцсан хугацаа;
- р) мэргэжил олгох, мэргэжил дээшлүүлэх курст суралцсан, үйлдвэрлэлийн сургалтаар мэргэжил эзэмшсэн болон гадаад орны үйлдвэр, аж ахуйн газарт үйлдвэрлэлийн дадлага хийж ажилласан хугацаа) ажилласан хугацаанд тооцохоор БНМАУ-ын хууль тогтоомжид заасан бусад хугацаа.

-----oO-----